

陶文毅公全集

陶文毅公全集卷十三目錄

奏疏 鹽法

籌議稽查糧船夾帶私鹽摺子

淮北商力積疲請借項官督商運附片

酌定楚西鹽船到岸限期並委員巡緝以杜夾帶

盜賣各弊摺子

陳奏岸鹽廣銷並嚴拏倭匪懲辦附片

覆奏課歸場竈之說未敢遽行摺子

淮北滯岸請試行票鹽附片

淮南奏銷展限摺子

查禁艍船帶私摺子

同空軍船夾帶私鹽請照上年章程嚴行查禁并
飭堵川私潞私摺子

奏疏 鹽法

籌議稽查糧船夾帶私鹽摺子

奏爲籌議糧船夾帶私鹽請治其源扼要稽查以收實效仰祈

聖鑒事竊照江西湖南湖北安徽等省回空軍船夾帶私鹽定例綦嚴連年條陳利病者多而弊仍未除併且日有甚焉罔由掩耳盜鈴奉行未力實亦稽查鮮要弊源未清之故何謂弊源未清天津商人利於鬻私甚至在於公埠明目張膽而爲之其弊一公埠雖有印票限以斤數而帶私者並不請票

鬻私者並不填票徒法難行其弊二青縣靜海滄
州交河南皮各州縣臨河商店存鹽過多並不按
應領應銷實數率付糧艘以鄰爲壑其弊三私鹽
窩囤存積河干專候糧船經過千夫運送萬人共
見兵役巡查翻無知覺其弊四糧船裝私均用小
船載送天津河下私船如織圍繞糧艘白晝上載
地方文武熟視無睹其弊五江廣糧道趕辦新漕
不能親押回空查私之責惟資幫弁其懦者畏難
苟安不肖者知情故縱遇有緣事革職往往糧船
代爲捐復按股攤費卽在夾帶之內其弊六丁舵

水手費本無多緣有奸民名爲風客出本貿鹽哄誘分利在南則裝載木植紙張瓷器雜貨抵津易鹽在北則天津土棍預買國鹽候船裝載盈千累萬幾及淮引全綱之數縱有犯案舵水甘心認罪從不將風客供出固結不解其弊七以上各弊皆爲糧私橫恣之根必應整飭伏讀近奉

上諭軍船私帶之弊以江廣爲最亦不獨江廣爲然其透漏鹽斤之弊以天津爲最亦不獨天津爲然與其按獲於旣帶之後不若嚴禁於未帶之先等因欽此仰見

聖明洞燭無微不喻所有天津一帶于家堡楊柳青獨
流等處及滄州之磚河地方現經直隸省委員巡
查自可堵截固販嚴拏私艇有犯必懲以杜弊源
一入江南地界臣卽委徐州鎮道大員嚴密迎查
兼防河北漏私并於楊莊勾水起卸渡黃之後應
於揚州之接鹽廳停泊待查惟該處河道窄隘易
致阻礙行船其時臣駐清江浦督催回空自可就
近酌派文武帶同兵役量擇上游一帶河道稍寬
之處照例梭檢隨查隨放如有例外多帶無論包
鹽散鹽塊鹽及鋪艚墊底醃雜蘿蔔各物之鹽皆

應起除跟追風客加等嚴治幫弁旂丁一併參懲
至駛出大江之後如老虎涇青山頭等處濱江洲
汊多有梟匪私鹽暗遞糧船且因向例有船至大
江不可攔阻誤運之文舵水人等卽藉此沿途逗
遛賣私遲至冬杪尙未歸次轉多貽誤伏查漕運
則例載乾隆三十年奏准糧船夾私在南則盤糧
廳揚州儀徵瓜洲等處俱專委文武官按查等因
足見出江以後仍應嚴查祇因廢弛已久僅在揚
州一帶按於北而遺於南遂至江路多私應將瓜
儀按查委員派至九江蕪湖等處會同關督按船

嚴查既不致另有耽延而按查益昭核實其餘濱江沿途各口仍照定例糧船在何處卸鹽卽應何處查拏不但江私可靖卽催趲亦得迅速矣至水手人等向遇按查嚴緊輒棄船四散混圖挾制委員恐誤歸次往往敷衍了事以致肆無忌憚自應申明定例一船之內丁舵爲主水手有犯責在旂丁如有逃匿一面嚴拏究懲一面督飭弁丁另雇水手駕船回次卽使稍延旬日儘可照湖南軍船送米岳州之例趕幫受兌不致有誤而舵水無辭挾制庶幾知盤查旣緊夾帶自稀仰副

聖主整飭離綱之至意所有現在籌辦稽查糧私各緣
由謹縷悉陳明恭摺具

奏伏乞

皇上聖鑒謹

奏

道光十一年五月十九日奉到

硃批另有旨欽此同日奉到道光十一年五月初八日

內閣奉

上諭陶澍奏籌議糧船夾帶私鹽請扼要稽查一摺江
西湖南湖北安徽等省軍船往往回空時夾帶私鹽

必應嚴行查禁據陶澍奏天津一帶于家堡楊柳青
獨流等處及滄州之磚河地方現經直隸委員巡查
著琦善嚴飭該員等查拏私艇堵截固販有犯必懲
以杜透漏迨入江南地界著該督派委徐州鎮道大
員嚴密迎查兼防河北漏私楊莊勾水起卸渡黃後
應於揚州之接鹽廳停泊待查惟該處河道窄隘易
致阻礙行船著該督酌派文武員弁量擇上游一帶
河道稍寬之處照例接查隨查隨放如有例外夾帶
鹽斤悉行起除根究出本質鹽之風客加等嚴治幫
弁旂丁一併參懲至駛出大江以後著將瓜州儀徵

按查委員派至九江蕪湖等處會同各該關監督按
船嚴查所有水手人等向遇按查嚴緊輒棄船四散
以圖挾制委員恐誤歸次往往敷衍了事遂致肆無
忌憚自應申明條例一船之內丁舵爲主水手有犯
責在旂丁如有逃匿一面嚴拏究懲一面督率弁丁
另雇水手駕船趕幫受兌不致有誤該督務當督飭
所屬認真稽查俾糧私淨盡以清弊源而收實效餘
著照所議辦理欽此

淮北商力積疲請借項官督商運附片

再淮北商力積疲已久上年發運秋單時能趕發場鹽存壩運銷者僅止數人其餘各商雖有認岸之名終年無鹽到岸小民刻虞淡食轉仰給於鄰私而各場竈產鹽積如山無商收買窮竈乏資餬口前經

欽差大臣王鼎等會

奏查辦淮鹺事宜十五條內議請湖運各岸應行革退乏商另招股商先籌官運以爲倡導之機一面籌款收買竈鹽以濟口食仰蒙

俞允在案茲

臣

督同運司詳加查察淮北引鹽額行河

南安徽江南四十九州縣除江運之無爲州等八處運腳較省向稱暢岸有商承運外其餘綱食口岸四十一處商人十七家有一商而認數岸者有一岸數商公認者其力可支持僅有二三家餘皆無力辦運本應另招股商接辦因疲累久著人皆視爲畏途僉辦招徠一時難得其人且久無到岸之引各處需鹽孔迫不得不先籌運濟惟委官運辦窒礙甚多而借銀給商又難歸款止有暫籌借項官督商運之一法較之專委於官專借與商尙

有把握查永豐壩現有存貯歷次運庫發銀收買
官鹽九萬一百七十二引應擇誠實商人借給水
腳領運分赴各岸併遴員督運俟其到岸售有課
銀收回應完錢糧及鹽價借項繳庫歸款其各滯
岸銷鹽本屬無多卽由附近暢岸隨時撥往接濟
免致盡爲私占第自壩渡黃過湖至岸運費浩繁
若以存鹽而計共需運腳銀四十餘萬兩方能全
數運竣現在庫貯支絀無項可動而事關北岸全
局又不得不量爲籌辦仰懇

天恩俯准於已丑殘引加斤案內帶徵課銀催商趕緊

交完先酌動銀二十萬兩以十二萬兩爲前項運腳之需轆轤轉運其餘八萬兩因海州分司所屬板浦中正臨興三場運商久不捆鹽竈戶枵腹待售困苦已極應查照上年原

奏辦理趕緊收買以濟竈艱卽將收買之鹽存貯各場俟本年秋單發運至壩飭商領運繳價還庫仍將收買發運事宜責成淮北監掣同知陳在文一手經理以專責成仍趕緊招商接辦庶積困或可稍甦感沐

鴻慈益無旣極據陞署兩淮運司俞德淵議詳前來理

合附片陳明伏乞

聖鑒謹

奏

道光十一年五月十九日奉到

硃批另有旨欽此同日奉到道光十一年五月初八日

內閣奉

上諭陶澍奏淮北商力積疲請暫籌借項官督商運等語
准北商力疲累已久此時招商另辦難得其人且
各處需鹽孔迫不得不先籌運濟據該督查明永豐
壩現有存貯歷次運庫發銀收買官鹽九萬一百七

十二引應擇誠實商人借給水腳領運分赴各岸并
遴員督運俟其到岸售有課銀收回應完錢糧及鹽
價借項繳庫歸款其各滯岸銷鹽無多卽由附近暢
岸隨時撥往接濟所需運腳銀兩著照所請准其在
於已丑殘引加斤案內帶徵課銀催商趕緊交完先
行酌動銀二十萬兩以十二萬兩爲前項運腳之需
其餘八萬兩因海州分司所屬板浦中正臨興三場
運商久不捆鹽竈戶困苦著查照上年原奏辦理趕
緊收買卽將收買之鹽存貯各場俟本年秋單發運
至壩飭商領運繳價還庫所有收買發運事宜卽責

成淮北監掣同知陳在文妥爲經理仍趕緊招商接
辦以肅離政欽此

酌定楚西鹽船到岸限期竝委員巡緝以杜夾帶
盜賣各弊摺子

奏爲酌定楚西等省鹽船到岸限期竝委員巡緝以
杜夾帶盜賣各弊仰祈

聖鑒事竊查兩淮鹽額每年應行引一百六十九萬五
千道零自道光六年丙戌綱統引五分未行七年
丁亥綱全統未行八年戊子綱亦銷未完數九年
己丑綱雖報行鹽七分仍多未行至十年庚寅竝
未開綱此五年內通計牽算每年僅銷引七十餘
萬道且戊子己丑二綱仍有已請未運引十三萬

七千八百三十餘道統計每年所銷之鹽不及額引十分之四皆由私鹽占礙銷數而船戶串同商夥商廝私帶鹽斤沿途逗遛盜賣或捏報淹消或私自折回購買私鹽復行運往輾轉耽延動輒經歷半年數月之久方始到岸實爲官引滯銷之根必須整頓查楚省商運江船行走限期定例自儀徵開行裝四五六七百引之小船限一個月到岸裝八九百引至一千二百引之中船限四十日到岸裝一千三百引以上至二千四百引之大船限兩個月以內抵岸倘遇風大難行該商將實在

不能依限緣由報明該地方官轉報行銷省分督撫鹽道稽查如沿途無故逾限分別責懲等因是舊例本爲周密惟運鹽至江西省向未定有限期應卽仿照一律酌定查儀徵至楚省漢口地方計程一千六百餘里儀徵至江西星子縣青山地方一千四百餘里以楚省限期比較其小船應定限二十日中船定限三十日大船定限五十日責成淮南監掣同知於商人雇船運鹽前赴楚西必視引數之多寡定雇船隻之大小總以裝滿九分爲率不許留有空艙致多夾帶至安徽河南各口岸

鹽船既分江湖兩運兼有換船起剝之處與楚西之專行大江者不同其船亦竝無大小應以淮安城北烏沙河開運之日起定限每日行三十里將盈補絀按程途之遠近扣日期之多寡責成淮北監掣查驗開行均不得留艙夾帶仍將開行及到岸限期竝勾量喫水尺寸另給催趲限單抵岸投驗由各該鹽道認真查對倘有中途風水阻滯亦照楚省舊例准其據實呈報如逾限不到卽行查辦根究庶商人船戶知有定限自不敢任意遲延至夾帶賣私之弊楚西一路爲甚往往鹽已賣盡

卽捏報淹消溯查從前曾委武職參游守備分在江面巡緝嗣於嘉慶年間因日久懈生議以裁撤應請仍復舊規每屆半年酌委參遊守備或文職二員自儀徵大江溯流巡緝至湖口分路一往江西一往漢口仍由原路查回儀徵換員前往接巡旣責以訪查夾帶賣私捏報淹消等弊又可沿途催趲行運則諸弊可冀漸除所委之員仍隨時查察勤惰分別勸懲用昭核實所有酌定鹽船到岸限期及委員巡緝緣由理合恭摺具

奏伏乞

皇上聖鑒謹

奏

道光十一年六月初四日奉到

硃批另有旨欽此同日奉到道光十一年五月二十日

內閣奉

上諭陶澍奏酌定楚西等省鹽船到岸限期並委員巡緝以杜夾帶盜賣一摺楚省商運江船行走限期舊例已爲周密惟運鹽至江西省向未定有限制據該督查明程途比較楚省限期酌定著照所議小船定限二十日中船定限三十日大船定限五十日責成

淮南監掣同知於商人雇船運鹽前赴楚西視引數之多寡定雇船之大小以裝滿九分爲率不許留有空艙致多夾帶至安徽河南各口岸鹽船旣分江湖兩運兼有換船起剝之處其船竝無大小著以淮安城北烏沙河開運之日起定限每日行三十里將盈補緝按程途之遠近扣日期之多寡責成淮北監掣查驗開行均不得留艙夾帶仍將開行及到岸限期並喫水尺寸另給催趲限單抵岸報驗由各該鹽道認真查對倘有中途風水阻滯照楚省舊例准其據實呈報如逾限不到卽行查辦至夾帶賣私之弊楚

西一路爲尤甚往往往鹽已賣盡卽捏報淹消從前會
委武職員弁巡緝嗣經裁撤著仍復舊規每年酌委
參遊守備或文職二員自儀徵大江溯流巡緝至湖
口分路一往江西一往漢口仍由原路查回儀徵換
員前往接巡責令訪查夾帶賣私捏報淹消等弊並
令沿途催趲行運毋任稍有逗遛其所委之員該督
仍隨時查察勤惰分別勸懲總須認真辦理杜絕諸
弊俾鹽引暢銷離務日有起色不可虛行故事日久
仍視爲具文以致有名無實該部知道欽此

陳奏岸鹽廣銷並嚴拏俵匪懲辦附片

再兩淮鹽務自新章既立刪除積弊鹽價稍減銷路漸通祇因五六月內各口岸雨水爲災售數有滯自入秋初菜市正旺現查七月內漢岸銷數惟十三日風雨未經售鹽其餘每日銷子鹽四五萬包至七八萬包並有銷至十一二萬包者統計自正月十一日起截至七月二十九日共銷鹽一千六百五十六萬七千餘包計引三十五萬五千九百有奇銷數之廣爲頻年所未有惟所銷皆係往年已經納課遲滯之積鹽此時尙剩二十五萬餘

引計冬間方能銷訖從此截清界限銷行辛卯綱
新鹽堅守章程不令擾混再將糧私一靖鹽務可
望起色現在湖北查辦腳私極爲認真儀徵爲捆
鹽之所尤須嚴查夾帶經臣疊飭實發水腳毋使
船戶藉口帶私其沿河訛詐黑費之匪徒前後訪
獲不下百餘均經懲儆業已肅然惟有窮民艚船
一項裝載私鹽積少成多數百成羣查有匪棍藉
災爲名雇覓老幼男婦裝點偷越當此災年正應
舍禁去幾之時旣不便索及災民而梟棍匪徒斷
不容其溷合自應設法分別辦理復經臣派委員

弁帶領兵役在於揚關駐查如係老弱災黎帶鹽
無幾准予給價收買以資矜卹其鹽卽交垣捆運
免致混入腳私如係匪徒雇覓裝載立刻拏現
亦均知斂跡至回倂多係鳳壽等處獷悍之徒帶
刀逞兇爲害地方不止於販私必應驅除臣前於
七月內路過三汊河等處聞有回倂與艍船搶奪
及拒捕之事卽經札飭各營縣無分畛域四面兜
拏旋據會稟拏獲匪犯丁雲霞等十六名又據奇
兵營稟獲倂匪耿金連等十五名瓜洲營先後拏
獲匪犯朱雲青蔡六等六名王義魁等九名揚州

營先後拏獲匪犯耿金剛李信春等十一名張正祥等十五名又續獲唐盛林等十二名李如魁等六名又據京口營先後獲匪王裕堂等及倭匪劉金亮等六名又督同高資營追獲徐貴等十名又獲魯士連等三名梁太等四名又據三江營守備稟截獲許正鳳張湧等四名並獲于金堂周占元等十八名以上各犯均係各營縣協獲並起有槍劍撲刀等物及鹽斤船隻經臣飭發運司督同府縣研訊分別懲辦至地方無賴棍徒藉災滋事尤爲可惡前經泰州拏獲倚衆訛索之王玉林等又

桐城縣拏獲過糶傷官之程瀛等均經臣疊飭從嚴究懲總使有犯必懲刁風自息於災區可期敕輯謹附片縷陳仰慰

宸廑謹

奏

道光十一年九月二十二日奉到

硃批覽奏深慰朕懷看此光景今歲江南雖罹水患來年以後自必漸復舊規裕國而安民通商而除害汝爲幹國良臣而朕亦獲知人善任之美名實有厚望焉一力勉行勿怠欽此

覆奏課歸場竈之說未敢遽行摺子

奏爲遵

旨核議鹽務條陳各件通盤籌畫恭摺覆

奏仰祈

聖鑒事竊

臣

節次承准軍機大臣字寄欽奉

諭旨將侍講學士顧純奏請課歸場竈光祿寺卿梁中

靖請就場收稅各一摺

飭交

臣

悉心籌畫核議具奏又前後遞到太僕寺少卿

卓秉恬請仿照王守仁贛關立廠抽稅一摺江西

巡撫吳光悅請撤商歸竈徵其課稅一摺均奉

旨交

臣

與湖廣江蘇江西湖北安徽河南各督撫悉心

妥議具奏各等因

臣

查諸

臣

所請變通鹽法其說

不一皆主於化梟爲良無官無私立意誠爲甚善

惟

臣

再四籌畫通盤合計仍有未敢遽議更張者

兩淮鹽課甚重三倍於江蘇全省之錢糧非通泰

海一隅之場地所能歸入若徵之於竈則沿海窮

民家無長物卽謂鹽歸丁賣不患其貧而一池一

鍬獲利幾何豈能以數百萬之鉅款散而費以完

納若欲就場收稅則又弊竇易滋蓋鹽之爲物與

布帛菽粟同功而不同用布帛菽粟隨處所有成

本重而課稅輕然且不免於透漏若鹽在場竈每斤僅值制錢一二文一經收稅則價隨課長爭其利者必多海濱廣斥民竈雜處池以掃鹽凡有箕帚者皆可掃鐵以前鹽凡有鍋竈者亦可煎將比戶皆私課稅且因之而更細至於設廠抽稅或可小試於一隅若行之於各省則與就場設官徵稅之法地不同而流弊同緣各省道路四通八達凡鹽所從入之地安必處處皆有隘可守繞越漏私轉恐比場竈爲更甚總之無官無私必須無課無稅而後可業經有稅有課卽屬有官有私如謂一

歸場電一設鹽販即可上裕

國帑而化梟爲良竊恐有所未能且此數說者皆本
於唐臣劉晏聽其所之一語故諸臣皆以爲化
梟之良策其實劉晏權鹽卽今商運之法所謂亭
戶糶商人是也晏建常平鹽倉數千商運不至則
減價以糶置巡院十三以捕私鹽姦盜爲之衰息
是晏恐遠省缺鹽及商電漏私已於聽其所之之
先大有布置並非僅聽其所之而遂能化梟爲良
也且晏當日係總天下之鹽而權之故能聽其所
之今則某省食某處之鹽各有口岸若准鹽任其

所之必至南侵浙閩北侵蘆潞兩淮未收其利而
他省已受其害矣倘因此遂改天下之鹽法盡歸
於場竈則紛更愈甚關係愈大利權不操於上必
移於下恐豪強兼併之徒得據爲利其患有甚於
私梟者是以上年冬間臣與尙書王鼎等通盤籌
酌業將課歸場竈及就場收稅種種窒礙之處詳
細聲明會同具

奏在案至分地銷鹽課歸商辦原係

國家成法第因日久弊生浮費愈增而愈多錢糧亦
愈加而愈重卽如每年應解之帑利七十餘萬其

借本早罄於前人彼時艱務猶堪敷衍又有此一
千餘萬之借本供其揮霍是以中枵而仍能粉飾
於外今則各項竭蹶無本可借而轉須爲前人歲
償其利息此外節省之款又有四十餘萬兩亦係
沿襲於昔年而加徵於此日以致負重難勝沈痼
從此而甚臣於萬難措手之時力求補救自接印
以來疏通積引懲辦私梟現據湖廣督臣函稱漢
岸舊鹽銷完新鹽業已開秤卽糧船水手素稱強
悍而本年回空亦未敢仍前夾帶倘再能多辦新
引似可望漸有轉機無如自三月開綱以來始而

章程初定商情不無觀望繼而被水成災場竈又多漫淹加以商本乏竭力能辦運者不過十數家設法支持勉圖接濟此等情形總緣從前之受病太深故此日之復原非易也臣自維愚昧實不敢謂計出萬全惟有殫精竭慮認真督辦并札催運司諭飭各商乘此旺銷之時設法趕運俟本綱限滿之後倘能得有起色則

本朝二百年來之成法卽無庸另議更張萬一無可挽回再行據實奏明另行籌辦總期於艱務實有裨益斷不敢稍存成見亦不敢推諉卸責致負

聖主委任之至意所有臣通盤籌畫鹽務悉心計議緣

由理合恭摺具

奏伏乞

皇上聖鑒謹

奏

道光十二年正月初五日奉到

硃批另有旨欽此

淮北滯岸請試行票鹽附片

再淮南商力雖疲然自開綱以來尙捆運至五十餘萬引淮北則止捆二萬餘引較定額不及十分之一實屬疲憊已人臣前與尙書王鼎等會議時卽經聲請另行籌辦本年奏准借動帶運殘鹽課銀二十萬兩將官收竈鹽督商辦運均係擇其暢銷之岸先行運往以冀早將庫項收回而滯岸仍無鹽濟售民間旣無官鹽不得不買向民販竈丁積有餘鹽亦不能不賣與民販臣體察情形擬將暢岸仍歸商運其餘滯岸卽仿照山東浙江票引

兼行之法於海州所屬之中正板浦臨興三場分
設行店聽小民投行購買運往售賣擇各場要隘
之地設立稅局給以照票註明斤數及運往何處
售賣字樣凡無票及越境者仍以私論如此通融
辦理俾竈丁民販皆獲有生計而所收稅銀又可
補正課之不足臣拜摺後卽札行運司妥議條款
酌量試行如果行之有裨再當漸次推廣設使行
之不便亦不難於停止理合附片聲明伏乞

聖鑒謹

奏

道光十二年正月初五日奉到

硃批另有旨欽此同日奉到道光十一年十二月二十

二日內閣奉

上諭陶澍奏開綱以來淮北祇捆二萬餘引較定額不及十分之一本年將官收竈鹽督商辦運均擇暢銷之岸先行運往以冀早收庫項而滯岸仍無鹽濟售民間既無官鹽不得不買向民販竈丁積有餘鹽亦不得不賣與民販等語著照所請淮北暢岸仍歸商運其餘滯岸卽仿照山東浙江票引兼行之法於海州所屬之中正板浦臨興三場分設行店聽民投行

三
購買運往售賣擇各場要隘之地設立稅局給以照
票註明斤數及運往何處字樣凡無票及越境者仍
以私論著陶澍卽飭運司妥議條款酌量試行該部
知道欽此

淮南奏銷展限摺子

奏爲鹽務奏銷屆期遵

旨奏明稍寬時日辦理並察看淮北未盡事宜分別核
辦以清界限仰祈

聖鑒事竊臣奉

命管理兩淮鹽務於道光十一年三月開行辛卯新綱
先於二月初六日承准軍機大臣字寄正月二十
七日奉

上諭陶澍奏接受兩淮鹽篆並陳現辦情形一摺據稱
兩淮鹽務積弊之後章程甫立節目尙多現在商人

力能辦運者不過二三十家新商僉募尙需時日兼之漢口積引不下數千萬兩非兩三月所能罄盡江西情形亦然前綱旣滯則辛卯新鹽卽截清界限於春月開綱而行抵楚西各岸已在夏秋之際明歲奏銷不能如期完竣等語自係實在情形所有明歲奏銷著准其稍寬時日屆期奏明辦理此後仍當年清年款不得復蹈故轍其餘未盡各事宜並著該督隨時察看分別奏咨核辦欽此欽遵卽督飭運司飭商領運並委員分赴江西湖北等省催辦疏銷其時楚西各岸均有節年滯銷傳引甚多皖省沿江食

岸亦然俱屬占閤成本有礙銷數內惟楚省查辦
腳鹽最爲認真截至十一月間已銷引五十餘萬
道爲歷年所未有第係己丑以前已納錢糧因公
墊占之引與新綱無涉而商力久乏非俟舊鹽售
出不能抽本接辦新鹽不得不讓出地位令其趕
緊先銷以便輾轆轉運迨至新鹽運抵口岸舊鹽
甫將銷訖又恐後鹽難繼經運司詳照緩納舊案
趕辦新鹽四十萬引旋又核數照辦而爲時已近
歲暮現入本年二月距辛卯開綱已屆一年期滿
例應奏銷查核綱引實祇請運及半安慶池州太

平及各食岸僅及十之二三總由舊積太多壓累
新綱商力已疲難於接濟兼之去夏新鹽發運時
陡值長江盛漲各省被水凡產鹽之場竈運鹽之
道路掣捆之洲地以及行銷之口岸莫不同時淹
漫轉運維艱致滋遲滯應請展至本年八月底俾
得稍寬時日趕運辛卯綱鹽一俟將次就竣卽釐
辦壬辰新綱嗣後仍當逐漸提早以冀挨復舊規
不任遲逾至淮北鹽引疲弊已久無商領運前經
臣會同王鼎寶興會議另籌辦理復經臣於去臘
奏請試行票引納稅之法現經委員前往海州各場

查勘一切未盡事宜尙須三兩月間方能籌立章程分別奏咨辦理未便仍與淮南綱引奏銷牽扯並辦應請將額引劃出另辦俟年底核算再行具奏以清界限而昭核實合併聲明據運司俞德淵議詳前來

臣謹繕摺具

奏伏乞

皇上聖鑒謹

奏

道光十二年三月初四日奉到

硃批另有旨欽此同日奉到二月二十一日內閣奉

上諭陶澍奏鹽務奏銷屆期請稍寬時日並察看淮北未盡事宜分別核辦一摺著戶部議奏欽此又奉

上諭前據陶澍奏鹽務奏銷屆期請稍寬時日並察看淮北未盡事宜分別核辦當交戶部議奏茲據奏稱兩淮鹽務疲乏已久現在銷鹽雖多均係已丑以前已經納課之引與新綱無涉其新鹽發運陡值各省被水轉運遲滯亦係實在情形自應量予展緩惟奏銷寬限一日卽占礙下綱一日之引該督遽請展限半年恐新綱難以接辦著子限四箇月展至本年六月內造報奏銷至楚西各岸均屬暢銷該督卽迅飭

各商及時捆運其次年如何提前以復原限之處並著確定限期據實具奏至兩淮例入奏銷課項共銀二百十餘萬兩此外加斤正課並應解帑利及外支外銷各款當大加釐剔之後俱應按款造報現在辛卯本綱將屆一年期滿並著該督速卽分晰造冊報部以備查核其淮北未盡事宜亦著迅速妥議章程分別辦理餘依議欽此

查禁船船帶私摺子

奏爲遵

旨查明窮苦船船因災帶私實無設立馬頭及屯戶過載等名目并前後設法查禁各緣由仰祈

聖鑒事 臣等承准軍機大臣字寄欽奉

上諭據御史卞士雲奏江蘇淮安揚州所屬下游州縣向有小舟名曰船船常以捕魚爲業本年因水勢稍大借饑民名色或數十船一起或數百船一起私梟乘勢勾結令其載運私鹽由戚家汊孔家涵等處徑出運河并沿江一帶地方售賣公然設立章程有屯

戶過載架護名目派人各司其事船大者裝至千斤
小者數百斤其聚集之處聞拏則婦人撒潑不拏則
強壯滋事秋間曾有壽州等處回民許姓曹姓多人
在三汊河地方因與艍船爭賣私鹽有燃放排槍之
事匪徒結黨互爭難保不別生他故該處上司非不
委員查緝每日報獲私鹽無如艍船來去如故誠恐
兵役人等先於按查時豫爲說明每船抽留若干以
爲搪塞報獲之計該地方官粉飾消彌竟不嚴行禁
絕并聞該梟匪等於江南之觀音門安徽之樅陽鎮
立有馬頭銷售艍船所載私鹽等語近來江船夾帶

與大幫私販俱漸斂跡乃梟徒另設此法逞其販私
之計往來擾累徒黨橫行殊屬目無法紀著陶澍程
祖洛鄧廷楨嚴行查辦先拏勾結之人使艍船無所
倚賴再押令各船自歸本籍違者重辦其三汊河爭
賣私鹽一案并觀音門樅陽鎮私設馬頭亦著嚴行
懲辦以靖私梟至其中實係貧苦之艍船應否編入
冊籍歸於賑務辦理亦著體察情形斟酌妥辦將此
各諭令知之欽此伏查上年被水成災淮揚各屬窮
民紛紛四出乘坐艍船乞食逃荒內中卽有趁便
捎帶鹽斤偷賣餬口者梟匪乘機誘雇內載私鹽

外坐老幼婦女裝點災民偷越撒潑皆所不免誠如

聖諭江船夾帶大幫私販俱漸斂跡乃梟徒另設此計販私必應從嚴辦理惟實在災民所帶無幾與梟販匪徒究有分別必須分散其勢使不相湊合

臣

陶澍當經派委參將繼倫帶兵駐劄揚州挨船接查如係實在災民卽給與鹽價收買放行以示體卹倘係梟販無難立刻擒拏

臣

程祖洛併卽檄行

鎮江府縣遇有此等船隻但放災民入口官爲雇船資送不准船船進口均經先後附片

奏明在案仍一面嚴飭地方文武及委員等實力巡
拏計自去秋至本年正月望間前後報獲私鹽五
十餘起共獲犯四百三十餘名私鹽六十九萬餘
斤人船俱獲併訪獲包攬船私之袁鶴林崇文廣
郭鵬倪鶴高劉志高及包攬仗頭韓廷貴姜照興
徐福年沈小寶陳渭南等私鹽失所倚賴咸知儆
惕統計各案所獲人鹽如三江營守備陳秉元等
稟獲劉成龍黃金山王喜林張德鳳等各起計犯
六十名共鹽四萬二千餘斤船二十四隻署揚州
營參將陳述祖守備崔衍等稟獲卞有玉王五夏

厚徵樊兆山張世勲等各起計犯二十二名鹽九萬九千餘斤船十三隻署泰州營遊擊劉振常等稟獲朱有發等一起計犯二十一名鹽十一萬三千餘斤船四十一隻泰州營遊擊金萬全等稟獲許開勲等一起計犯八名鹽四萬餘斤船十一隻副將田松林等稟獲耿金芮高順王知遠高繼保沈遇邦魏有德徐有才王大春孫景榮鮑林喜吳志元丁兆松等各起計犯七十餘名鹽四萬餘斤船三十二隻候補運判韓在洛史揚善等稟獲孔來鸞等一起計犯四十三名鹽十五萬八千餘斤

船一百三隻此外人鹽併獲者尙多因係地方文武應辦之事不敢瑣屑上瀆

聖聰其分外出力者均經記名拔補酌賞銀兩頂戴其拏獲大夥巨梟例應

奏獎者仍俟定案時辦理察看各員弁咸知激奮趨公勉圖上進緝捕並未鬆勁且每起獲犯較多船鹽並獲似不致有粉飾消彌每船抽留若干以爲塘塞報獲之事查上年七月

臣

陶澍自清江回省

路過揚州聞有回僑梟匪在三汊河搶奪艍船私

鹽經揚州瓜洲汛弁

擊逃竄

臣

比卽劄調附近

各營縣四面兜擒花時江路迷漫汪洋一片各兵役追至高資境內拏獲曹華等十一犯徐貴卽許貴等十六犯又獲另案梟匪共一百四十餘人發交運司俞德淵督同揚州府王青蓮運判童濂等晝夜研訊究出窩黨及槍刀器械等件將各犯按律問擬軍流徒杖分別咨部完結併於鹽務暢銷情形摺片縷陳附及欽奉

硃批裕國而安民通商而除害汝爲幹國良臣而朕亦獲知人善任之美名實有厚望焉一力勉行勿怠欽此查此案早經嚴行懲辦私梟斂迹似不致轉生

他故至觀音門近在省城豈容梟匪設立馬頭誠恐在城文武得規包庇茲復逐細確查加以密訪實屬毫無影響亦並無公然設有屯戶過載等名目惟是兩淮離務正當整頓之時前此洪流泛溢港汊紛歧舟船處處可通不止孔家涵戚家汊爲然上江食岸已多受舨私之累現在雖無勾結販私仍當督屬嚴查有犯卽懲不任疎懈至各舨船皆係下河窮民應否歸於賑務辦理臣等於接奉諭旨後卽飭藩司督同各府從長籌議茲據詳稱舨船一項前於查賑途次察看裏河各州縣所在多有

其有停泊一定處所者現在聞賑歸來多已入冊給賑其往來無定者例不給賑即使押令同籍按口給賑而原籍無業可依亦必又顧之他卽難免不重複冒領冊籍難稽且亦難保不於領賑後仍復出外販私似可照舊無庸查辦至此項冊船一名倒撐船時而捕魚時而覓食行蹤無定來往自如祇因漫無稽察是以易被匪誘勾結載私應請仿照沿江漁船之例將船戶姓名籍貫年貌及男婦大小口數查明填給印牌懸掛艙口以便稽察等情臣等查核應如所議辦理已一面出示曉諭

各船毋許販載私鹽其貧苦有籍可歸者仍許其
造入賬冊補給其行蹤無定四出覓食者遇有捐
施粥米之處亦許其隨同災民領食以廣

皇仁而資綏輯除樅陽鎮有無販私馬頭另由安徽撫

臣鄧廷楨查明辦理外所有江蘇省船船查明並

無私設馬頭等名目及設法查禁販私各情形臣
等謹合詞恭摺覆

奏伏乞

皇上聖鑒謹

奏

道光十二年三月十四日奉到

硃批另有旨欽此同日奉到道光十二年三月初四日

內閣奉

上諭前據御史卞士雲奏江蘇淮揚所屬下游州縣向有私梟勾結艍船載運私鹽設立馬頭銷售并有屯戶過載架護名目當交剛澍等嚴行查辦茲據奏淮揚各屬上年被水成災窮民乘坐艍船四出乞食間有捎帶鹽斤偷賣餬口梟匪乘機誘雇內載私鹽外坐婦女裝點災民計圖偷越經該督等飭屬巡拏前後獲犯四百三十餘名私鹽六十九萬餘斤并訪獲

包攬艍船各犯嚴加懲辦私鹽失所倚賴咸知儆惕至觀音門近在省城並無梟匪設立馬頭暨屯戶過載等名目等語此項艍船窮民乘坐捕魚覓食行蹤無定梟匪勾結載私實於離務大有關繫嗣後著仿照沿江漁船之例將船戶姓名籍貫年貌及男婦大小口數查明填給印牌懸掛艍口以便稽核該督等仍當督飭各屬認真查察有犯卽懲以杜梟私而肅離政欽此

回空軍船夾帶私鹽請照上年章程嚴行查禁并
飭堵川私潞私摺子

奏爲回空軍船夾帶私鹽請照上年巡緝章程嚴行
查禁並飭堵川私潞私以冀疏銷恭摺具奏仰祈
聖鑒事竊照各省軍船回空向自天津至江南一帶沿
途裝載私鹽侵銷引地最爲淮綱之害而安徽江
西湖北湖南等幫爲尤甚上年節次欽奉

諭旨飭令直隸山東各省督撫及漕督鹽政諸

臣

於軍

船經過地方節節盤查嚴防透漏行抵江南界內
卽由

臣

遴派文武員弁分投堵緝時當整頓之初

在事大小人員仰遵

聖訓俱能實力查禁私鹽顆粒不能上船幫丁水手亦皆畏懼守法糧私得就肅清實從來所未有本年軍船現已開行北上轉瞬回空誠恐各幫丁舵人等意存牟利妄冀堵緝稍寬復萌故智該管員弁又或日久懈生致夾帶之風息而復起於兩淮綱食各岸大有關繫現值疏銷喫緊之際不可不預爲之防除俟屆期仍由臣遵照上年奏案分段派委幹員認真巡緝外惟是揆揆於已經夾帶之後不若飭禁於未經裝載之先應請

敕下直隸總督山東巡撫長蘆鹽政各飭所屬於軍船
經過之處仍照上屆章程嚴密稽查不准私鹽售
賣上船如有土梟風客囤積鹽斤跟幫上載一併
訪拏究治至回空軍船例有總運丞倅又有各幫
押空衛弁耳目切近稽察易周果能各禁各幫尤
易爲力應由漕臣嚴諭押空員弁自行防範如有
於例帶食鹽之外私帶鹽斤立即起除淨盡并治
以應得之罪倘該員弁等不能實力查禁抑或有
心徇庇一經接獲照例嚴加參處務使積年宿弊
永遠肅清於鹺務大有裨益抑臣更有請者兩淮

引地莫大於湖廣而湖廣私鹽莫多於川路上年
回空糧私淨盡官鹽自應暢銷乃入春以來楚岸
銷數轉不及去冬之暢固緣上年被水成災當青
黃不接之時民力拮据以致銷數較絀亦實由川
私潞私乘機侵越日甚致占淮綱查潞私由河南
南陽等府充斥襄樊下游安陸荆門胥被侵灌川
私則由夔關而下直達宜昌荊州接舸連橋尤爲
楚岸大害近年湖北銷數往往不及湖南是其明
證若不嚴行堵截即使糧私淨絕仍難望淮引疏
銷亦應請

旨敕下四川總督河南巡撫嚴飭夔州南陽各府於各
境內認真查禁勿任偷越行私並由湖廣督撫選
派明幹文武員弁於川豫接壤要隘分投實力堵
截查拏以靖私源而利官運至江船夾帶及買租
放斤等弊臣隨時查禁不敢稍懈並經湖廣督撫
嚴稽水程委員弔租防閑甚爲周密似內私之弊
實可漸就廓清所有籌議查辦糧私及嚴堵川私
潞私各緣由理合恭摺具

奏伏乞

皇上聖鑒訓示謹

奏

道光十二年五月初十日奉到

硃批另有旨欽此同日奉到道光十二年四月三十日

內閣奉

上諭陶澍奏查禁回空軍船夾帶私鹽並嚴堵川私潞
私一摺各省軍船回空沿途裝載私鹽侵銷引地最
爲淮綱之害上年節次降旨飭令經過各省督撫漕
督鹽政諸臣督飭所屬節節盤查嚴防透漏糧私得
就肅清本年軍船北上轉瞬回空誠恐夾帶之風息
而復起於兩淮綱食各岸大有關係著直隸總督山

東巡撫長蘆鹽政嚴飭各屬於軍船經過之處仍照
上屆章程嚴密稽查不准私鹽售賣上船如有土梟
風客囤積鹽斤跟幫上載務卽訪拏究治並著漕運
總督嚴諭押空員弁隨時防範遇有私帶鹽斤立卽
起除淨盡並治以應得之罪倘該員弁等不能實力
查禁抑或有心徇庇卽行嚴加參處至潞私由河南
南陽等府充斥襄樊下游安陸荊門胥被侵灌川私
由夔關而下直達宜昌荊州尤爲楚岸大害自應認
眞堵截俾淮引得以疏銷著四川總督河南巡撫嚴
飭夔州南陽各府於各境內實力認真查禁勿任偷

陶文毅公全集

卷十三

奏疏

三

越並著湖廣督撫選派明幹文武員弁分投於川豫
接壤要隘堵截查拏以靖私源而利官運欽此